

四庫全書

子部

按：本書屬子部，原書封面則誤作經部。

欽定四庫全書

子部
折獄龜鑑卷八

詳校官中書臣徐志晉

編修臣倉聖脈覆勘

謄錄監生臣陳長春

謄錄監生臣陳遂

欽定四庫全書

折獄龜鑑卷七

宋 鄭克 撰

鈞慝

李崇

已見釋冤門

按崇之譎以舉哀擿爭兒姦與其術同蓋自其巧詐而言之則謂之姦自其隱慝而言之則謂之慝其實無異也故術亦同焉

張元濟

按新唐書本傳作允濟冊府元龜亦作元濟與此本同

唐張元濟隋大業中為武陽令務以德教訓下百姓懷之元武縣與其隣接有人以牝牛依其妻家者八九年牛孳生至十餘頭及將異居妻家不與縣司累政不能決其人詣武陽質於元濟元濟曰爾自有令何至此也其人垂泣不止且言所以元濟遂令左右縛牛主以衫蒙其頭將詣妻家村中云捕盜牛賊召村中牛悉集各問所從來處妻家不知其故恐被連及指其所訴牛曰

此是女聶家牛也非我所知元濟遂發蒙謂妻家人曰
此即女聶可以歸之妻家叩頭服罪

舊出唐書本傳

按史記以西門豹附滑稽傳後豹古循吏也特以其
止河伯娶婦事巧而捷乃發於俳者故曰滑稽耳元
濟其豹之儔歟理鄰邑贅婿牛亦以發於俳故能巧
而捷與止河伯娶婦事相類矣然乃循吏鈎慝之術
也 疑獄集又載新鄉令裴子雲一事云部民王恭
戍邊特牛六頭於舅李璉家養五年產犢三十頭恭

還索牛舅曰特牛二頭已死乃還四頭老特餘非汝
牛所生恭訴於縣子雲以恭付獄追盜牛賊李璉璉
惶怖而至子雲叱責曰賊引汝同盜牛三十頭藏汝
莊內喚賊對辭乃以布衫籠頭立南牆下璉急吐款
云三十頭牛是外甥特牛所生非盜得來子雲令除
恭頭布衫璉驚曰此是外甥子雲曰是即還牛更欲
何語璉默然復謂璉曰五年養牛辛苦特與五頭餘
並還恭聞者歎服

舊不著
出處

此乃用元濟鈎隱之術者

但部民則易追而非部民則難追矣故元濟詣彼村
中捕盜也然越境有所捕召集一村牛亦是當時可
以為此若在異日止合移文追而詰之如趙和者是
也但欲巧捷者勢須為此耳

趙和

侯臨附

唐江陰令趙和咸通初以折獄著聲淮陰有二農夫比
莊通家東鄰嘗以莊契質于西鄰後當取贖先送八百
千自恃密熟不取丈證再齎餘鎰至西鄰遂不認東鄰

訴于縣又訴于州皆不獲伸理遂來訴于江陰和曰縣政甚卑何以奉雪東鄰泣曰至此不得理則無處伸訴矣問爾果不妄否曰焉敢厚誣乃召捕賊之幹者齎牒淮陰云有劫江賊案劾已具其同惡在某處姓名狀貌悉以西鄰指之請梏付差去人西隣自恃無迹初不甚懼至則械于庭和厲聲詰之因泣訴其枉和曰事迹甚明尚敢抵諱所劫之物藏汝莊中皆可推驗汝具藉質產以辯之囚不虞東隣之越訴乃供折穀若干莊客某

人者細絹若干家機所出者錢若干東鄰贖契者和復
審問乃謂之曰汝非劫江賊何得隱諱東隣贖契錢八
百千遂引其人使之對證於是慙懼服罪梏回本縣檢
付契書寘之於法

舊不著
出處

按和所用之術蓋亦本於張元濟也近時小說載侯
臨侍郎一事云臨為東陽令時他邑有民因分財產
寄物姻家遂被諱匿屢訴弗直聞臨治聲來求伸理
臨曰吾與汝異封法難以治止令具物之名件而去

後半年縣獲強盜囚縱令妄通有贓物寄某家乃捕至下獄引問泣訴盜所通金帛皆親黨所寄臨即遣人追民識認盡以還之此乃用和鈎慝之術者雖巧捷不逮而沉密過之譬猶持重之將不苟出於奇亦必依於正以此用譎則無敗事尤可貴也

包拯

錢餘附

包拯副樞初知揚州天長縣時有訴盜割牛舌者拯密喻令歸屠其牛而鬻之遂有告其私殺牛者拯詰之曰

何為割某家牛舌而又告之其人驚服觀本

接近時小說載朝散大夫錢穌一事云穌嘗知秀州
嘉興縣有村民告牛為盜所殺穌令亟歸勿言告官
但召同村解之遍以肉餽知識或有怨即倍與民如
其言明日有持肉告民私殺牛者穌即收訊果其所
殺此乃用拯鈎慝之術者蓋以揣知非仇不爾故用
此譎使復出告也昔趙廣漢善為鈎距以得事情晉
灼云鈎致也距閉也蓋以閉其術為距而能使彼不

知為鈞也夫惟深隱而不可得故以鈞致之彼若知其為鈞則其隱必愈深譬猶魚逃於淵而終不可得矣是故史稱唯廣漢至精能用之他人效者莫能及也此數君子材智過人亦庶幾焉

案盜

按此門原缺
標題今補

張敞

黃昌
附

漢張敞為京兆尹長安市偷盜多百賈苦之敞既視事求問父老偷盜首長數人居皆溫厚出從童騎閭里以

為長者敬皆召見責問因貫其罪把其宿負令致諸偷

以自贖偷長曰今一旦召詣府恐諸偷驚駭願一切受

職

按職漢書作署

敬皆以為吏遣歸休置酒小偷悉來賀飲且

醉

按漢書作且飲醉

偷長以赭汙其衣裾吏坐閭里閱出者汙

赭輒收縛之一日捕得數百人窮治所犯或一人百餘

發盡行法罰由是桴鼓稀鳴市無偷盜

出漢書本傳舊集不載

按盜賊不得獄訟必多其當察而治之亦與奸慝等

矣是以舊集有彭城書菜元膺擒擧之類凡十餘事

今則因而列此六門也。敞以偷盜治偷盜督察之術莫善於此。故首著焉。若後漢黃昌為蜀郡太守，密捕盜帥一人，脅使條陳諸縣強暴姓名，居處分遣掩討。無有遺脫，宿惡大姦奔走他境，則又猛政之尤者。抑亦用敞察盜之術歟。

曹攄

晉曹攄為洛陽令，大雪宮門，夜失行馬。攄使收門士，衆謂不然。攄曰：「宮掖禁嚴，非外人所敢盜。必是門士以燎。」

寒耳訊之果服

舊出晉書本傳

按此以事理察之也。攄若不善察盜姑徇衆人所見，則有罪者幸免而無辜者濫及獄訟，不勝其繁矣。是故折獄之術亦有取於此也。

蘓瓊

本傳盜牛一事附

北齊蘓瓊為齊州行臺左丞，行徐州事。城中五級寺忽被盜銅像一百軀，有司搜檢四隣防宿及蹤迹，所疑逮繫數十人。瓊一時放遣，寺僧怨不為推賊。瓊曰：「便且還。」

寺得像自送爾後十日抄賊姓名及賊處所徑收掩悉

獲之

出北史本傳
舊集不載

按傳又載一事云瓊為南清河太守時有魏雙成者
失牛疑其村人魏子賓列送至郡一經窮問知其非
盜而便放之變成云府君放賊去百姓牛何處可得
瓊不理其語密遣訪獲盜者與此相類蓋能廣耳目
以察盜賊也傳言郡中有舊賊一百餘人悉充左右
人間善惡及長吏飲人一盃酒無不即知此其耳目

歟然既曰舊賊必非志實豈可深信乃見親委耶魏
吳校事竊權害政人皆患苦久乃誅戮瓊之駕馭何
以勝彼而能免斯患耶張敞召偷長悉受職特取其
一時之用而已矣未嘗置之左右任以耳目豈非慮
患深歟瓊耳目察盜賊可也此一事不足法略辨
其理云

韓褒

尹賞附

後周韓褒為北雍州刺史州帶北山多有盜賊褒密訪

之並豪右所為也而陽不之知厚加禮遇謂曰刺史起
自書生安知督盜所賴卿等共分其憂耳乃悉召桀黠
少年素為鄉里患者置為主帥分為地界有盜發而不
獲者以故縱論於是惶懼首服曰前盜發者並某等為
之所有徒侶皆列其姓名或亡命隱匿者亦悉言其所
在褒乃取盜名簿藏之因大榜州門曰自知行盜者可
急來首即除其罪盡今月不首者顯戮其身籍沒妻子
賞先首者旬月之間諸盜咸悉首盡褒取名簿勘之一

無差異並原其罪許以自新由是羣盜屏息

出北史本傳舊集不

載

按褒之察盜與張敞類矣若尹賞為長安令則不然
部勒戶曹掾史與鄉吏亭長里正父老伍人雜居長
安中輕薄少年惡子無市籍商販作業而鮮衣凶服
者悉籍記之得數百人一朝會長安吏車數百兩分
行收捕皆劾以為通行飲食羣盜賞親閱見十置一
其餘悉納虎穴中

穿地方深各數丈致令辟為郭以大石覆其口名曰虎穴

為輩數日一發視皆相枕藉死

後世縣令不能會吏車如此之多亦不敢

為虎穴使數百人相枕藉死蓋時異則法異也

所置數十百人乃其魁宿或

故吏善家子失計隨輕黠願自改者賞其罪詭令立

功以自贖盡力有效者因親用之為爪牙追捕甚精

郡國亡命散走各歸其處不敢闖長安

見漢書本傳

賞雖

亦以偷盜治偷盜善於駕馭稱其職任然異乎張敞

不純用誅罰故號酷吏為萬世戒唯褒之察盜視敞

可以無愧其不同者彼窮治所犯糾之以猛也此首

原其罪施之以寬也。故之猛不至於民殘而市無偷盜。褒之寬不至於民慢而羣盜屏息。則是同歸於治也。

柳慶

已見釋冤門

張允濟

按允濟前條作元濟蓋傳寫異文

唐張允濟初仕隋為武陽令。時道中見一姥種葱結菴守之。允濟曰：「但歸不煩守此。」遇盜即來告。姥婦一宿而

葱大失允濟乃召集葱地左右居人呼令前一聽之

遂得盜葱者

舊出唐書本傳

按周禮以五聲聽獄訟求民情一曰辭聽觀其出言
不直則煩二曰色聽觀其顏色不直則赧三曰氣聽
觀其氣息不直則喘四曰耳聽觀其聽聆不直則惑
五曰目聽觀其顧視不直則眊允濟召集葱地左右
居人呼令前一聽之遂獲盜葱者盖用此術也然
其意度頗涉矜街非不得已而用之則與郤雍視盜

察其眉睫之間而得其情者何以異哉苟未能使人耻為盜不若聽姚守之也

蘓無名

唐則天時太平公主庫中失所賜寶器天后怒督捕甚峻官吏震恐有湖州別駕蘓無名善擒奸擿伏游徼至縣請見長史長史問之請聞朝廷天后召見無名對曰請寬府縣盡以捕盜吏卒付臣不過數日決為陛下獲盜天后許之無名戒吏卒於東北門伺察有人十餘輩

衣衰經出赴北邙即踵以報果見諸人至一新冢設奠哭而不哀既徹奠又巡行冢旁相視而笑無名喜曰得之矣遂使吏卒盡執之而發其冢剖棺視之寶器在焉天后問以何術獲盜對曰臣無他術但識盜耳臣到都日正見此輩出葬便知是盜但未知葬處今清明拜掃計必出城尋逐蹤跡可以得之哭而不哀者所葬非人也巡冢而笑者喜其無傷也向若陛下迫促府縣此賊計急必取而逃矣天后稱善遷秩二等

舊不著出處

董行成

唐懷州河內縣董行成善察盜有人從河陽長店盜一驢并囊袋天欲曉至懷州行成市中見之叱曰彼賊住盜下驢即承伏少頃驢主尋蹤至或問何以知之曰此驢行急而汗非長行人也見人即引驢遠過怯也是故知其為盜也

舊不著出處

按蘓與董非聞人也特以察盜尺寸之長著於舊集傳於今世與賀懷智琵琶米嘉榮歌李暮笛託名唐

人詩中者類矣苟無所長誰復稱之使不泯沒亦足勸能也

裴度

許仲宣附

唐裴度在中書時堂吏忽報亡失省印同列驚愕皆欲究治度略不顧問良久復報印在故處度笑謂同列曰此必吏人盜印驛券也向若急之則投諸水火矣同列乃服

出趙璘因話錄舊集不載

按此蓋以事理察盜者也其略不顧問則與蘓無名

請寬府縣之意同矣彼緩以伺之獲為盜之人此緩而待之獲所盜之物皆可謂善處事也 許仲宣漢乾祐初登進士第為曹州濟陰簿先是縣印令與簿晝夜更掌時令有妾與室爭寵不能禁妾恚恨欲陷其主於罪竊取印藏之封緘如故仲宣受之翌日吏將用印開但空匣因逮捕縣吏及令簿僕廝家人繫獄驗問果得於令舍人竇大煙煤中初失印衆皆恐仲宣晏然不為之動既而果獲人服其量此乃量足

以處事識足以察盜者也夫吏盜省印以有所欲故爾妄盜縣印以有所忿故爾此兩者可以得盜之情矣則當用是察之也仲宣後事本朝終於給事中

見本傳

閻濟美

唐閻濟美鎮江南有舟人傭載一賈客物甚繁碎密隱銀十錠於貨中舟人窺見伺其上岸盜之沈於泊船之所夜發至鎮旦閱諸貨而失其銀乃執舟人詣官濟美

問船上有何物曰搜索皆無昨夜宿何處曰去此百里浦汊中亟令武士與船夫同往索之審諭武士曰必是舟人盜之沈於江中矣可令楫師沈釣取之獲當重賞武士依命獲篋銀在其中封題猶全舟人遂服罪舊不著出處

按治民之官每患姦盜敢為欺蔽善料事者譬猶用兵善料敵也濟美所以知舟人盜銀沈于江中者此耳是亦可稱也

歐陽頴

歐陽頴郎中知歙州富家有盜啓其藏捕甚急久不獲
有司苦之頴曰勿捕獨召富家二子械付獄鞫之吏民
皆曰是素良子也大恠之二子服罪猶疑不勝楚掠而
自誣及取其所盜某物於某處皆是乃譴曰公神明也

見歐陽修叅
政所撰墓誌

何中立

何中立龍學知開封府先有盜慈孝寺神御服器者知

府李絢嘗以屬吏不服而釋之及中立視事或復執所釋囚至中立熟視之曰此真盜也遂窮治之盡得其贓

見本傳

徐的

徐的省副知荆南府荆南故多火姦人緣以為盜有一

夕十發者的籍諸惡少為保伍使更相伺察由是火幾

息

見本傳

按此盖用韓褒察盜之術也若火發處有盜不獲同

保伍人以故縱論則彼焉敢不察姦盜乎由是火幾
息蓋火乃姦盜為之也

彭思永

彭思永侍郎為益州路轉運使時攝成都府事蜀民以
交子貿易多置衣帶中而盜於爪甲挾刃伺便微取之
至十百而不敗民甚病之思永捕獲一人使盡疏其黨
悉黥隸諸軍盜以衰息

見本傳

按此盖用黃昌捕盜帥一人脅使條陳諸縣強暴分

遣掩討之術也若非有以脅之豈肯盡疏其黨無所
隱漏乎若非分遣掩討豈能黥隸諸軍無所遺脫乎
雖以嚴治而無酷名止用其察盜之術而不為其殘
民之政此又賢於黃昌遠矣

迹盜

尹翁歸

漢尹翁歸守右扶風姦邪罪名縣各有籍盜賊發其比
伍中翁歸輒召其縣長吏曉告以姦黠主名教使用類

推迹盜賊所過抵類常如翁歸言無有遺脫

出漢書本傳舊集不

載

按翁歸之治姦邪也雖各有名籍不比而誅之必待盜賊發其比伍中乃召長吏教使推迹無有遺脫則與尹賞黃昌異矣是故彼有惡名而此得美譽蓋其材頗同而德弗類也迹盜之術此其大者故首著焉

高澈

北齊彭城王浟為滄州刺史有一人從幽州來驢馱鹿

脯至滄州界脚痛行遲偶會一人為伴盜驢及脯去明
旦告州洩乃令左右及府僚吏分市廐脯不限其價其
主見識之推獲盜者轉都督定州刺史時有人被盜黑
牛背上有白毛長史韋道建謂中從事魏道勝曰使君
在滄州擒姦如神若捉得此定神也洩乃詐為上府市
牛皮倍酬價直使牛主認之因獲其盜建等歎服又有
老母姓王孤獨種菜三畝數被偷乃令人密往書菜葉
為字明日市中看菜菜有字獲賊爾後境內無盜政化

為當時第一

舊出北史本傳

按前二事皆有迹可求而萊之迹頗難辨故以書字驗之若夫詐為上府買皮而倍酬其直乃兼以譎取之者也

高潛

北齊任城王潛領并州刺史一婦人臨水浣衣有騎馬人換其新靴馳去婦人持故靴詣府訴潛留靴召居城諸嫗以靴示之給曰有乘馬於路被賊殺害遺此靴馬

得無親戚乎一嫗拊膺哭曰兒昨著此靴向妻家如其

語捕獲之一時稱明察

舊出北史本傳

按潛留故靴者將以迹求之也給諸嫗者兼以譎取之也與波買皮事頗相類然居城諸嫗所以可召者北齊承後魏喪亂之後并州城中居人不多雖盡召之亦不為擾苟或蕃庶當如楊津下教而已此在隨事制宜也

張鷟

唐張鷟為河陽尉有客驢疆斷并鞍失之三日訪不獲詣縣告鷟推窮甚急乃夜放驢出而藏其鞍鷟曰此可知也遂令不秣飼驢去轡放之驢尋向昨夜餵處乃搜索其家於草積下得之人服其智

舊不著出處

按管仲之相齊侯也伐山戎還而迷失道仲令解縱老馬軍隨以行乃得之鷟蓋采用此術也夫故道有迹可求而人莫能識彼皆識故道者則宜假以求之矣是亦君子善假於物之義也顧憲之任牛索主亦

以此歟

桑懌

桑懌崇班嘗居汝潁間諸縣多盜自請補耆長往來察
姦匪因召里中惡少年戒之曰盜不可為吾不汝容也
有項里父子死未斂盜夜脫其衣去父不敢告官懌疑
少年王生者為之夜入其室得其衣而王生未之知也
明日見而問之曰爾許我不為盜今盜里父子尸非爾
耶少年色動即推仆地縛之詰其盜者姓名盡送縣皆

按以法

見歐陽修叅政所撰惲傳

按朱邑為桐鄉嗇夫而死有遺愛仇覽為蒲亭長而時稱大化惲之賢雖不逮古人請為耆長事亦可書故卒能立功當世垂名太史此特稱其迹盜之一節爾亦足以勸也

譎盜

高謙之

後魏高謙之為河陰令有人囊盛瓦礫指作金詐市人

馬因而逃去詔令追捕甚急謙之乃偽枷一囚立於馬市宣言是前詐市馬賊今欲刑之密遣腹心察市中私議者有二人相見欣然曰無復憂矣執送案問悉獲其

黨

舊出北史高恭之傳謙之其兄也

按譎盜之術與擿姦同彼亦用譎以擿之也

慕容彥超

錢惟濟附

漢慕容彥超為鄆帥日置庫質錢有姦民以偽銀二錠質錢十萬主使久之乃覺彥超陰教主吏夜穴庫牆盡

徙其金帛於他所而以盜告彥超即勝于市使民自占所質以償之民皆爭以所質物自言已而得質偽銀者

執之服罪

舊出五代史本傳

按錢惟濟留後知成德軍有以偽銀質錢者其家告官惟濟密謂曰第聲言被盜而立賞捕之質偽銀者

必來責餘直果然乃用彥超謫盜之術者也

見本傳

有謫之不出者何哉或盜轉而之他或盜知其為謫也是故用謫宜密而速與兵法同矣

孫沔

已見懲惡門

陳述古

陳述古密直嘗知建州浦城縣富民失物捕得數人莫知的為盜者述古紹曰某廟有一鐘至靈能辨盜使人迎置後閣祠之引囚立鐘前喻曰不為盜者摸之無聲為盜者則有聲述古自率同職禱鐘甚肅祭訖惟之乃陰使人以墨塗鐘良久引囚以手入帷摸之出而驗其

手皆有墨一囚獨無墨乃見真盜恐鐘有聲不敢摸者

訊之即服

此見沈括內翰筆談云亦古法出於小說

按譎非正也然事有賴以濟者則亦焉可廢哉抑又聞之正不廢譎功乃可成譎不失正道乃可行是於譎盜之術取其一端而已蓋亦未可責備也然與鑊摸鐘皆用譎鉤慝頗似鞠情之術矣但意所主者特在於盜故以附譎盜門也

察賊

趙廣漢

孫沔附

漢趙廣漢為京兆尹郡中盜賊閭里輕俠其根株窟穴所在及吏受取請求銖兩之姦皆知之長安少年數人會窮里空舍謀行劫坐語未訖廣漢使吏捕治具服

漢出

書本傳舊集不載

按此廣耳目以察賊者也孫沔副樞知徐州時淮陽軍有強盜數人捕之急過徐境沔即知之方晏客淮陽檄至召吏諭曰淮陽賊幾人易衣冠舍其處少頃

皆捕至庭下

見孫威敏公遺事錄

與廣漢類矣史稱廣漢善為

鈞距以得事情謂鈞致其隱伏使不得遁距閉其形迹使不可窺也世言沔所用為耳目者雖左右親信之人亦莫能曉殆亦挾此術歟

符融

已見釋冤門

柳崇

後魏柳崇為河中太守郡人張明失馬疑執十餘人崇

初到郡見之不問賊事人別借以溫顏更問其親老存否農業多少而微察其辭色即獲真賊呂穆等二人餘並放遣郡中畏服境內帖然

出北史本傳舊集不載

按崇不問賊事者惡彼匿其情也問以親老存否農業多少者欲彼吐其情也於是真情見乎辭色乃可微察以獲真賊是亦用鞠情之術者也賊與盜異害物曰賊攘物曰盜劫取曰賊竊取曰盜此失馬者殆被劫歟不然何以疑執十餘人也

韋鼎

隋韋鼎為光州刺史州中有土豪外修邊幅而內行不軌嘗為劫盜鼎於都會時謂之曰卿是好人那忽作賊因條其徒黨姦謀逗遛其人驚懼即自首服

出南史韋鼎傳其

孫也舊集不載

按此亦廣耳目以察賊者用於鞫情之術則以中其忌諱故能使之首服也

呂元膺

柳公綽附

唐呂元膺鎮岳陽因出游覽有喪輦駐道左男子五人
衰服隨之元膺曰遠葬則汰近葬則簡此必詐也亟令
左右搜索棺中皆兵刃乃擒之詰其情對曰欲過江劫
掠故假為喪輦使渡者不疑又有同黨數輩已在彼岸
期集悉捕獲以付法

借不著
出處

按蘓無名察盜之術正與元膺察賊相類柳氏叙訓
有一事云柳公綽為襄陽節度使歲歉鄰境尤甚有
齊衰者哭且獻狀曰遷三世十二喪于武昌為津吏

所遇不得出公綽覽之即命軍候擒其人破其柩皆
實以稻米蓋葬於歟歲不應并舉三世十二喪故知
其詐耳雖非刼取者而與元膺搜舉事頗相類也故
附著之然議者以為閑糴非美不足為法令但取其
明察慮有他姦故著為察賊之鑒耳

張詠

張詠尚書知江寧府有僧陳牒出憑詠據案熟視久之
判送司理院勘殺人賊翌日羣官聚聽不曉其故詠乃

召問為僧幾年對曰七年又問何故額有繫巾痕即惶怖服罪蓋一民與僧同行於道中殺之取其祠部戒牒

自披剃為僧也

見李旼虞部所撰忠定公語錄

按善察賊者必有以識之使不能欺也善鞠情者必有以證之使不可諱也詠實兼此二術矣可不謂之明乎

喬某

喬某虞部知果州西充縣時有強寇夜出剽掠罪人久

不獲民或爭財而訟於庭某察其物色有異乃曰是必

前日盜也收詰之果服

見呂大監正字所撰墓誌某華陰郡人失其名

按昔魯兩生有大臣節而史失其名然迹之著不可
揜也今江某之覈姦喬某之察賊其事必傳矣雖失
其名亦何憾哉

迹賊

司馬悅

已見釋冤門

按此與高潛留靴之術同但彼譎而此正耳

魏昶

唐中書舍人郭正一破平壤得一高麗婢名玉素極姝
艷令專知財物庫正一夜須漿水粥玉素遂毒之良久
覓婢不得又失金銀器四十餘事勅令捕賊鼎沸三日
長安萬年尉石良有主帥魏昶請喚舍人家奴取少年
端正者三人布衫籠頭又傳衛士四人問十日以來何
人曾覓舍人家衛士云有投化高麗留書與舍人捉馬

奴書見在取驗之但言金城坊中有一空宅更無他語
視乃往金城坊應空宅並搜之果至一宅封鎖甚密即
時打開婢及投化高麗皆在乃是投化高麗與捉馬奴

藏之勅斬於東市

信不著出處按唐書郭正一傳云正一與郭代舉魏元同岑長倩並相高

宗唐平章事自正一等始正一為中書舍人當出征高麗酷吏周興誣而殺之非為婢所毒也其征高麗者有郭待封乃孝恪之子武將其後乃以中書舍人副薛仁貴代吐蕃敗績死附見薛仁貴傳中亦無為婢所毒事此蓋小說所載傳聞繆說不足信者姑取其事之迹可也

按視喚舍人家奴取少年端正者三人布衫籠頭欲

以誦取之也又傳衛士四人問十日以來何人曾覓
舍人家欲以迹求之也雖兼用二術然誦賊不效而
迹賊效矣譬猶得雀者網之一目而不可以一目之
網捕雀也昶雖小人而善捕賊與蘓無名董行成類
矣特著其事以勸能者不為無補也

劉崇龜

已見釋冤門

府從事

已見釋冤門

桑懌

虞謝附

桑懌崇班初以右班殿直為永安縣巡檢明道末京西旱蝗有惡賊二十三人樞密院召懌至京師授以賊姓名懌曰盜畏吾名必潰潰則難得矣宜先示之以怯至則閉柵戒軍吏不得一人輒出居數日其下不知其為數請出自效輒不許夜與數卒服盜服述盜所嘗行處入民家老小皆走獨一媼留為治飲食如事羣盜懌歸

閉柵三日復往自携具就媼饌而以餘遺媼媼以為真盜乃稍就與語及羣盜媼曰彼聞桑殿直來皆遁去近閉營不出知其不足畏今皆還矣某在某處某在某所憚又三日往厚遺之遂以實告曰我桑殿直也為我察其實勿泄後三日復來又三日而往媼盡得居處之實以告憚明日部分軍士盡擒諸盜其尤強梁者憚自馳馬取之

見本傳

按憚先閉柵謫賊使不走乃因媼迹賊使不覺然後

悉擒之皆兵法也

後漢虞詡為朝歌長時賊甯季

等數千人攻殺長吏屯聚連年州郡不能禁詡到官

既誘令劫剽伏兵殺之又潛遣貧人能縫者傭作賊

衣以采線縫其裾為識有出市里者吏輒擒之賊遂

駭散咸稱神明

出後漢書本傳

是亦兵法也然於迹賊之術

悉皆有所考焉顧用者如何耳故並著之以備采擇

也

誚賊

蘇秦

蘇秦在齊大夫與之爭寵使人刺之不殊而去求賊不得秦且死謂齊王曰臣死之後王車裂臣以徇於市曰蘇秦為燕作亂於齊如此則刺臣之賊必得矣王如其言賊果出乃誅之

舊出春秋後語

陸雲

晉陸雲為浚儀令民有被殺而主名不立者雲錄其妻而無所問十許日遣出密令人隨其後謂曰不出十里

當有男子候之與語便縛來既而果然問之具服云與其妻同謀殺之聞得出欲共語畏憚近縣遠相要候人

皆歎服

舊出晉書本傳

按此蓋察其妻有姦狀故拘錄之以譎姦人使疑而出也

楊津

後魏楊津為岐州刺史有武功人齋綃三百疋去城十里為賊所劫時有使者馳騎而至被劫人因以告之使

者到州以狀白津津乃下教云有人著某色衣乘某色馬在城東十里被殺不知姓名若家人可速收視一姥哭而出云是已子遣騎追收并絹俱獲

舊出北史楊播傳津其子

也

按此與高潜留靴給嫗術同彼以靴為迹此以衣與馬之色為迹而皆用譎取之其異者彼實得靴則主於迹而兼以譎此空言衣與馬之色則主於譎而示以迹也

柳慶

後周柳慶領雍州別駕有胡家被劫郡縣按察莫知賊處鄰近被囚者甚衆慶以賊是烏合可以詐求之乃作匿名書榜官府門曰我等共劫胡家徒旅混雜終恐泄露今欲首服懼不免誅若聽先首免罪便欲來告慶乃復施免罪之牒居二日廣陵王欣家奴面縛自告牒下

因此盡獲黨與

舊出北史柳蚪傳慶其弟也

蔣常

張松附

已見釋冤門

按常之留媼盖用陸雲錄妻之術誦賊使出乃可捕獲也唐張松壽任長安令時昆明池邊有劫殺賊勅限十日捕獲督責甚峻松壽至行劫處撿蹤見一老嫗路傍賣飯即以從騎馱歸縣中供酒食三日却馱送舊處令一腹心人密往伺察之有人來問賊事即收縛果有一人問曰明府若為推勘遂擒送縣一問款服并贓皆獲

舊不著出處

此又用蔣常留媼之術者也

劉崇龜

已見釋冤門

按賊逃匿者譎使出焉免於追捕之煩其術固不可廢然人之逃匿既可譎取之矣則情之隱匿亦可譎取之也摘姦鉤慝是譎取其情者也故彼兩門又與鞠情之術相似也

折獄龜鑑卷七

欽定四庫全書

折獄龜鑑卷八

宋 鄭克 撰

嚴明

何武

前漢時沛縣有富家翁貲二十萬一男纔數歲失母別無親屬一女不賢翁病困思念恐其爭財兒必不全遂呼族人為遺書悉以財屬女但餘一劍云兒年十五付之後亦不與兒詣郡訴太守何武因錄女及壻省其手

書顧謂掾史曰女既強梁壻復貪鄙畏賊害其兒又計小兒正得此財不能全護故且付女與壻實寄之耳夫劔所以決斷限年十五智力足以自居度此女壻不還其劔當聞州縣或能明證得以伸理此凡庸何思慮深遠如是哉悉奪其財與兒曰弊女惡壻

案弊字通
典作蔽

溫飽

十年亦已幸矣聞者歎服

舊出風俗通○案此事亦見
杜佑通典原本多誤字謹依

通典
改正

按張詠尚書知杭州先有富民病將死子方三歲乃

命壻主其貲而與壻遺書云他日欲分財即以十之
三與子七與壻子時長立以財為訟壻持書詣府請
如元約詠閱之以酒酹地曰汝之婦翁智人也時以
子幼故此囑汝不然子死汝手矣乃命以其財三分
與壻七分與子皆泣謝而去

見李旼虞部所撰忠定公語錄

此正類

何武事也夫所謂嚴明者謹持法理深察人情也悉
奪與兒此之謂法理三分與壻此之謂人情武以嚴
斷者壻不如約與兒劒也詠以明斷者壻請如約與

兒財也雖小異而大同是皆嚴明之政也

鍾離意

後漢鍾離意為會稽北部督郵有烏程男子孫常與弟

並分居各得田四十頃

按四十頃通典作十頃

並死歲饑常稍以

米粟給並妻子輒追計直作券沒取其田並兒長大訟
常掾史皆言並兒遭餓賴常升合長大成人而更爭訟
非順遜也意獨議曰常身為伯父當撫孤弱而稍以升
合券取其田懷姦詐貪利忘義請奪其田界並妻子

衆議為允

見通典不著出處舊集不載

按聽獄者或從其情或從其辭夫常取並妻子田固有辭矣奈其懷挾姦詐貪利忘義之情何意獨以情責常是不從其辭而從其情也可不謂之嚴明乎

陳矯

魏陳矯為魏郡太守時繫囚千數有至歷年矯以為周有三典之制漢約三章之法今惜輕重之理而忽久繫之患可謂繆矣自覽罪狀一時論決

出魏志本傳舊集不載

按此蓋罪狀已定而輕重有疑吏不敢決者也使有罪不論無罪久繫自古以為患矣然拘文之吏每每如此繆可知也易曰君子以明慎用刑而不留獄矯自覽罪狀所謂明慎也一時論決所謂不留獄也若罪狀未定者慮有冤誣理當考覈豈可取快一時耶君子於此宜盡心焉

王敬則

南齊王敬則為吳興太守錄得一偷召其親屬於前鞭

之令偷身長掃街路久之乃令舉舊偷自代諸偷恐為

所識皆逃去境內以清

出南史本傳
舊集不載

按偷之冒法初不畏罪設此二事令其厭苦庶或可戢也

裴俠

後周裴俠為戶部中大夫時有姦吏主守倉儲積年隱沒至千萬者及俠在官勵精撻發旬日之間姦盜畧盡轉工部中大夫有大司空掌錢物典悲泣

按北史作掌錢典李貴乃

於府中
悲泣

或問其故對曰所掌錢物多有費用裴公清嚴

懼遭罪責俠聞之許其自首

出北史本傳
舊集不載

按彼未知懼也俠則治之此已知懼也俠則宥之其
治之者可以為嚴矣其宥之者可以為明矣明者無
他灼見物情也

趙嘏

隋趙嘏為冀州刺史嘗有人盜嘏田中蒿為吏所執嘏
曰此乃刺史不能宣風化彼何罪也慰諭遣之令人載

蒿一車賜盜者愧耻過於重刑

見北史本傳
舊集不載

按嚴明者不必厲威刑也察見物情中其忌諱有過於市朝之撻者嗟載蒿賜盜益以此耳不然則彼將玩侮尚何愧耻哉

王鏐

蕭嶷附

唐王鏐為淮南節度使有遺匿名書於前者左右取以授鏐鏐納之韉中先有他書以雜之吏退鏐探取他書焚之人信其匿名書亦焚也既歸而省所告異日以他

微事連所告者禁繫按驗以譎其衆下吏以為神明出唐

書本傳舊

集不載

按南齊豫章王嶷不樂聞人過失左右投書相告置
鞞中竟不視取焚之鍰蓋樂聞人過失者則其譎也
不若疑之正也昔朱博每遷徙易官所到輒出奇譎
以明示下為不可欺者鍰豈慕其為人歟

張希崇

晉張希崇鎮邠州

按張希崇鎮邠寧在後唐明宗時書中作晉當作後唐為是

有民

與郭氏為義子自孩提以至成人後因戾不受訓遣之
郭氏夫婦相繼俱死有嫡子已長郭氏諸親教義子訟
云是真子欲分其財前後數政不能決希崇判曰父在
已離母死不至雖云假子辜二十年養育之恩儻是親
兒犯三千條悖逆之罪甚為傷害名教豈敢理認田園
其生涯盡付嫡子所有訟者與其朋黨委法官以律定
刑聞者皆服其斷

舊不著
出處

按唐制選人試判三條辭理愜當決斷明白乃為合

格謂之拔萃希崇之判蓋本於此惟其愜當明白是故聞者皆服也

張齊賢

王延禧附

張齊賢丞相在中書時戚里有爭分財不均者更相訴訟又因入官自理於上前更十餘斷不服齊賢曰此非臺省所能決也臣請自治之上既許乃坐相府召訟者問曰汝非以彼所分財少乎皆曰然即命各供狀結實且遣兩吏趣徙其家令甲家入乙舍乙家入甲舍貸財

皆安堵如故文書則交易之訟者乃止明日奏狀上大
悅曰朕固知非卿莫能定也

出司馬光丞
相涑水紀聞

按曾肇內翰撰王延禧朝議墓誌云延禧任岳州沅
江令時有兄弟分財者弟弱所得田下訴不均詰其
兄曰均矣即令二人以所得更取之兄訴於州州守
笑曰此張詠尚書斷獄法也豈彼所聞異乎

燕肅

鞠真
卿附

燕肅侍郎知明州俗悍輕喜鬪肅推先毆者雖無傷必

加以罪後毆者非折跌支體皆貸之於是鬪者為息

見本

傳

按民之鬪毆傷有輕重理有曲直不治其傷而治其理者乃息鬪之術也若折跌支體則理雖直而傷已甚斯不可貸矣譬猶鬪殺用刃以故殺論蓋其情重也沈括內翰說鞠真卿知潤州時民有鬪毆者本罪之外別令先下手者出錢以與後應者小人斡財兼不甘輸錢於敵人終日分爭相視無敢先下手者

蓋無賴之民不畏杖責故設此事以折伏之與王敬則治偷之術同也見筆談近時州縣間固有使民輸下拳錢者然官自取之則不足以懲惡而適所以招怨斯失其本矣豈若不治其傷而治其理之簡易乎

韓琚

鄧思賢附

韓琚司封嘗通判虔州其民善訟或偽作冤狀悲憤呼呼似若可信者會守缺琚行郡事究其風俗考其枉直下莫能欺辭伏者自以為不冤終於兩浙轉運使魏公

琦之兄也

見尹洙龍圖所撰墓銘

按沈括內翰說江西人好訟有一書名鄧思賢皆訟牒法也其始則教以侮文侮文不可得則欺誣以取之欺誣不可得則求其罪以刼之鄧思賢人名也始傳此術遂名其書村校中往往以授生徒見筆談然則琚所以究其風俗考其枉直者豈特下莫能欺蓋亦人不可刼不可刼所以為嚴也莫能欺所以為明也彼其辭伏者自以為不冤非此故歟

葛源

葛源郎中初以吉州太和簿攝吉水令他日令始至猾吏誘民數百訟庭下設變詐以動令如此數日令厭事則事常在吏矣源至立訟者兩廡下取其狀視有如吏所為者使自書所訴不能書者吏受之往往不能如狀窮輒曰我不知為此乃某吏教我所為也悉捕劾致之法訟以故少吏亦終不得其意

見王安石丞相所撰墓誌

按為政者苟欲戢吏唯嚴明可夫民雖好訟也若非

吏與交通亦焉能獨為欺誣却持之計耶吏不得其意則民訟宜少矣源使民自書所訴不能書者吏受之乃鞠民情覈吏姦之術也彼既姦猾自當畏戢操術如此不亦可乎

劉敞

劉敞侍讀知永興軍時大姓范偉冒武功令祚為祖穿祚墓以己祖母祔之規避徭役者五十年數犯法至徒流輒以贖免長安人共患苦之然吏莫敢治敞按其事

獄未具而召由是辭屢變證逮數百人獄連年不決詔

取付御史臺驗治卒如敝所發

見本傳

按范偉之橫人患苦之然敝按其冒蔭避役證逮數百人連年不決者何也彼於黨與結之厚矣乃敢爾也證逮之人其黨與也豈易鞠哉且長安人共患苦之然吏莫敢治則桀黠可知也非按者嚴明不能發其事非鞠者嚴明不能得其寔是故姦民多幸免也獄辭屢變益以此歟

許元 劉晏附

許元待制初為發運判官患官舟多虛破釘鞠之數蓋以陷於木中不可秤盤故得為姦元首至船塢命拽新

造舟縱火焚之火過取其釘鞠秤之

按劉熙釋名鉸鑄也關西謂之釘鉸

此文釘鞠無出或即釘鉸聲之訛耳比所破纔十分之一自是立為定額

見魏泰東軒筆錄

按元不治虛破之罪而但立為定額可也然亦異乎

劉晏矣 蘇軾尚書說晏江淮發運使時於揚州造

船每隻載米一千石破錢一千貫而實費不及五百貫或譏其枉費晏曰大國不可以小道理凡所創制須謀經久船場執事者非一有餘剩衣食可以養活衆人則私用不窘而官物牢固由是船場人皆富贍五十餘年饋運不闕至咸通末有吳堯卿者始勘驗每船合用物料實數估給其值無復寬剩而船場自此破壞饋運自此闕絕晏言大國不可以小道理良可信也

見奏議

元定釘鞠額無乃類吳堯卿乎雖幸而

不至敗事然其嚴明乃俗士所誇君子所鄙不可為後世法也

張式

張式郎中初為南劍州將樂縣主簿有銀冶坐歲課不足繫者常數十百人式籍其人使富貧財力相兼課遂有美人無繫者

見王安石丞相所撰墓誌

按式知銀冶歲課所以不足蓋緣冶戶或有財而無力或有力而無財於是籍其人使富貧財力相兼則

富者不患力乏貧者不患財窘課遂有美理宜然也
昔之繫者常數十百人今則人無繫者矣嚴明之政
不當如是乎

孫甫

孫甫待制為華州觀察推官時州倉粟惡吏當負錢數
百萬轉運使李紘以吏屬甫乃令取斗粟舂之可棄者
十纔一二又試之亦然吏遂得弛負錢數十萬而已紘

因薦之

見曾鞏舍人
所撰行狀

按嚴明者非若世俗以苛為嚴以刻為明也持循事
理照察物情之謂也以事理言之則倉粟雖惡不應
盡可棄也以物情言之則負錢數百萬將何以償耶
甫取斗粟舂之可棄者十纔一二但負錢十萬而已
吏既得弛重負官亦獲保舊積是持循照察之效也
可不謂之嚴明乎

周沆

本傳鹽價
一事附

周沆侍郎嘗為河東轉運使自慶厯以來河東行鐵錢

民多盜鑄吏以峻法繩之抵罪者日繁終不能禁沆乃命高估鐵價盜鑄者無利不禁自息

見司馬光丞相所撰神道碑

按沆知慶州時邊民多闌出塞販青鹽沆請損官鹽之價犯者稍哀

見本傳

夫或高鐵估或損鹽價法異而

意同皆治其本也治其末者雖繩以峻法而終不能禁徒為苛刻耳治其本者雖處以平法而姦盜自止豈非嚴明乎苟欲嚴行政理要惟明見事情然後政不苛暴事不刻核而獄訟省矣彼籍治而課羨蠶粟

而負少者亦猶是也

王罕

王罕大卿知潭州民有與其族人爭產者辨而復訴前後十餘年罕一日悉召立庭下謂曰諸家皆里富人無乃厭追逮之苦今無狀子寒饑不能以自存況析產之券有不明以故久不決人能少資之令其遠去後復何患乎皆泣聽罕命自言方對吏時雖欲求為此顧不可得於是遷所訴者於旁州獄訟為之哀止

見王珪丞相所撰墓誌

按嚴明之術在於察見物情裁處事體彼爭產者困於寒饑析產者苦於追逮理之曲直何足深校苟或可已無不聽命於是人少資之令其遠去則析產者所損不多而免追逮之苦爭產者所獲不少而脫寒饑之困州民獄訟亦為哀止豈非能察見而善裁處乎儻忿其辨訴加以峻罰則物情不無所傷而事體亦有所害稱為嚴明斯失之矣若君子則雖昭然深察毅然決行而從容中理無傷害也豈非嚴明之懿

者乎

矜謹

袁安

後漢袁安為河南尹政號嚴明然未曾以賊罪鞠人常稱曰凡學仕者高則望宰相下則希牧守錮人於聖世尹所不忍為也聞者皆感激自勵在職十年京師肅然

出後漢書本
傳舊集不載

按安之政號嚴明必不容姦矣其未嘗以賊罪鞠人

蓋疾夫案吏者務為深刻文致於賊也若彼賊狀自
露非我鞫而出之雖繩以法亦何憾焉

司馬芝

魏司馬芝為大理正有盜官練寘廁中者吏疑女工遂
收付獄芝曰刑戮之失在於苛暴今先得贓物後訊其
辭若不勝楚掠或至誣服豈可折獄且簡而易從大人
之化也不失有罪庸世之治耳今宥所疑以隆易從之
化不亦可乎太祖從其議

舊出魏
志本傳

王坦之

晉王坦之襲封藍田縣侯時卒士韓悵逃亡歸首云失牛故叛有司劾悵偷牛考掠服罪坦之以為悵束身自歸而法外加罪懈怠失牛事或可恕加之木石理有自

誣宜附罪疑從輕之例遂以見原

出晉書王湛傳坦之其曾孫也舊集不載

按訊盜練劾偷牛皆慮自誣而遂見宥合矜謹之義矣

蕭子良

任昉彈事附

南齊竟陵王子良為會稽太守時山陰人孔平詣子良
訟嫂市米負錢不還子良歎曰昔高文通與寡嫂訟田
義異於此乃賜米錢以償之

出南史本傳
舊集不載

按梁御史中丞任昉彈中軍參軍劉整因兄寅第二
息師利

按原本作第一庶息
今據任昉本集改正

往整田上經十二日整

便責寡嫂范米六斗哺食米未展送忽至戶前攘拳
大罵突進屋中屏風上取車帷準米去亦引高鳳事
為彈文蓋鳳隱者也太守連召恐不得免自言本巫

家不應為吏又詐與寡嫂訟田遂不仕若整與平意實忘義固異於此然昉請免整收治其罪而子良但賜米錢以償之不治平罪何也責士之法不以責民是亦所以為矜謹也

陸襄

梁陸襄為鄱陽內史時妖賊鮮于琮敗獲之後鄰郡豫章安成等守宰案其黨與因求貨賄皆不得實或有善人盡室罹禍唯襄郡境枉直無濫人歌之曰鮮于抄後

善惡分人無橫死賴陸君

出南史陸慧曉傳襄其從孫也舊集不載

按推窮賊黨者苟不矜謹必至枉濫彼使善人盡室罹禍與賊何異哉襄之用心獨異於彼宜其人歌之也

宋世軌

附蘇瓊

北齊宋世軌為廷尉少卿洛州人聚結欲劫河橋吏捕按之連諸元徒黨千七百人崔昂以為反數年不斷及世軌為廷尉判其事為劫唯殺魁首餘從坐悉捨焉

北出

史宋隱傳世軌其
族孫也舊集不載

按蘇瓊為三公郎中時頻有告謀反付瓊推檢事多
申雪崔昂為尚書謂瓊曰若欲立功名當更思餘理
乃數雪反逆身命何輕耶瓊正色曰但雪冤枉不放
反逆昂大慙夫崔昂亦善折獄其意如此乃寒伯寄
所謂考囚者咸共言妖惡大故臣子所宜同疾今出
之不如入之可無後責是以考一連十考十連百者
也且昂於此獄數年不斷豈非求反狀未得乎世軌

判為叔事理所當然斯可以無慙於瓊矣是皆矜謹之君子也

郎茂

陸襄附

隋郎茂初授衛州司錄有能名尋除衛國令

隋諸王置國官有令

一人至煬帝時改國令為家令

有部人張元預與從父弟思蘭不睦丞

尉請加嚴法茂曰元預兄弟本相憎嫉又坐得罪彌益其忿非化人之意也乃遣縣中耆舊更往敦諭道路不絕元預等各生感悔詣縣頓首請罪茂曉之以義遂相

親睦稱為友悌

出北史郎基傳茂其子也舊集不載

按梁陸襄為鄱陽內史有彭李二家先因忿爭遂相誣告襄引入內室不加責誚但和言解諭之二人感

恩深自咎悔乃為設酒食令其盡歡酒罷同載而還

因相親厚

出南史本傳舊集亦不載

夫異姓之疏也誣告之怨也

猶可和解使相親厚況親族之不睦者乎彼猶未容

責誚此可遽加嚴法乎矜謹之士宜鑒於茲故並著

焉

張詠

王質附

張詠尚書再知益州民有負販者翁役其婦婦違之翁怒剪其髮曰我作婢使汝其子自外歸作鬧所由具事領過或謂其子曰翁剪婦髮何罪子若執父汝罪不輕至廳下詠詰之翁云婦自剪髮泥某子亦云妻自剪髮泥翁詠察其誑即於解狀後判云雖然子為父隱其奈執辭不定既不可窮詰於尊長又不可抑斷於卑幼仰責新婦狀今後再不侍養別具狀領過並放詠謂掾屬

曰五服之內卑幼條至重親民之官所宜盡心

見李政虞部所

撰忠定

公語錄

按王質待制知荆南有媼訴其婦薄於養婦言舅亡
姑嫁既窮而歸且奉事無不謹質曰姑雖不良獨不
顧夫耶因取家人衣以衣媼又給以廩粟使歸養之
皆感泣而去見本傳此其翁姑理皆不直然家人之義
當責卑幼但不可遽繩以法耳是故恕其罪而責之
養也

薛奎

仇覽韋景駿二事附

薛奎參政知益州有婦人訟其子不孝詰之乃曰貧無以養奎因出俸錢與為資業而遣之

見本傳

按後漢仇覽為蒲亭長有陳元者獨與母居而母訟元不孝覽驚曰吾近過元舍廬落整頓耕耘以時此非惡人當是教化未及耳母守寡養孤苦身投老奈何肆忿一朝欲致子以不義乎母感悟涕泣而去覽乃親到元家與其母子飲因為陳人倫孝行譬以禍

福之言元卒成孝子

見後漢書本傳

唐韋景駿為貴鄉令有

母子相訟者景駿曰令少不天常自痛爾幸有親而

忘孝耶教之不孚令之罪也因嗚咽流涕付授孝經

使習大義於是母子感悟請自新遂為孝子

見唐書本傳

此皆與奎出俸錢為資業之意同矣苟繩以法子罪
不輕令律所謂可從而違堪供而闕者是也得謂
之矜謹乎

任布

任布副樞知越州民有被酒罵其祖者祖既訴之已而
大悔哭於庭曰老無子賴孫以為命布特貸出之且上
書自劾朝廷亦不之問

見本傳

按孫罵祖法當死特貸出之理宜自劾此乃矜其失
教而謹於用刑者也

蘇渙

蘇渙郎中知鄢陵縣時歲荒盜起有兄殺弟而取其衣
者弟偶不死與父偕往訴之渙閱其窮而為姦問之曰

汝殺而弟知其不死而捨之者何兄諭其意曰適有見者不敢再也由是得不死父子皆感泣及渙罷去負任

從之數千里

見蘇轍門下所撰墓表

按古之聽獄者求所以生之不得其所以生之者乃刑殺焉孫罵祖有可生之理以其被酒且祖自悔也兄殺弟有可生之理以其苦饑且弟不死也布之貸出其孫渙之慮問其兄皆得其所以生之者也可無愧於古人矣

李士衡

高化附

李士衡觀察初釋褐為京兆鄠縣主簿府知其才俾權獄掾咸陽縣有民殺人具獄以送府父子五人其為從者皆服加功之罪士衡告於尹曰彼殺人者止一人耳餘四人掩其骸可坐以加功寘之重辟乎尹喜從其議曰四人者非子之明則寃於地下矣

見范仲淹參政所撰神道碑

按以掩骸為加功是深文也罪不應死而文致之何其忍哉嘗聞用法殺人無異用刃殺人深文之罪縱

或幸免鬼得而誅之也高化太尉雖起行伍頗知民
事晚守相州部有大獄皆當論死化疑之命移他獄
訊蒙活者三人殆亦以掩骸為加功之類歟此矜謹
者所宜盡心也

王博文

王博文副樞知密州時負海有濤落鹽場歲歉民多盜
鬻吏捕逐之輒起捍鬪皆坐法當死博文上言請權弛
鹽禁俟歲豐如舊從之

見本傳

按周禮荒政十有二其曰緩刑曰舍禁曰去幾者博
文所請義與合焉苟非通達古今豈能矜謹如是耶

王質

王質待制嘗通判蘇州以病在告知州黃宗旦來省問
因言獄有盜鑄錢者百餘人吾陰以術鉤得之質曰弋
不射宿惡陰中於物也今殺數人而徒流者又數十人
公陰中之也宗旦瞿然為貸其死罪而餘悉輕出之

見本

傳

陳執方

李士衡附

陳執方大卿通判江州時民饑有刈人之禾而傷其主法當死者執方以為古之荒政所以恤人者盡矣然尚

緩刑況於今哉即奏貸其死

見王安石丞相所撰墓誌

按李士衡觀察權知天雄軍民有盜瓜傷主者法當死士衡以歲饑奏貸之自是著為例執方之奏盖用

此例也

見本傳

陳巽

陳巽賓客初為常州團練推官盜有棄財走者巽以為不應死通判不肯用其言巽力爭而讞之盜卒得不死

見曾鞏舍人所撰神道碑

按盜非傷主計賊為罪棄財走者豈復應死通判不肯用其言必持深刻之說故失矜謹之義也

胡向

胡向少卿為棗州司理參軍時有盜七人皆當死向疑其有冤乃留訊之則二人者果不同謀始受其傭而中

道被脅以行卒得免死

見呂大防丞
相所撰墓誌

按捕獲盜者七人乃合格故以被脅為同謀蓋希賞
爾斯不仁哉宜其留訊而卒免之也

張奎

王濟
附

張奎密學初為常州推官轉運使舉監衢州酒稅婺州
有滯囚法當死獄成三問輒不服命奎覆案一視牘而
辨之得不死人皆服

按奎一視牘而辨之者謂辨其情理也人有迹狀重

而本情輕者昔既酌情而立法今當原情以定罪安得不辨情理而抵之死耶此其精明固能服人至於審謹尤可傳世王濟郎中為澶州司理掾時州獄有重囚臨刑稱冤濟覆按之亦得不死與此類矣豈非哀矜折獄而然歟

二事並見本傳

李允元

素安附

李允元給事通判寧州時州卒謀亂事發連逮者衆允元極意辨析止坐首惡數人誅之

見本傳

按後漢袁安舉能理劇拜楚郡太守時楚王英謀為逆事下郡考覈辭所連及繫者數千人顯宗怒甚更案之急迫痛自誣死者甚衆安到郡不入府先往按獄理其無明驗者條上出之府丞掾吏皆叩頭爭以爲阿附反虜法與同罪不可安曰如有不合太守自當坐之不以相及也遂分別具奏帝感悟即報許得出者四百餘家允元殆有袁安之心歟事在州郡辨析固易然其矜謹亦可嘉也

李應言

榮諲吳育
二事附

李應言諫議為侍御史時鄆州民傳妖法者其黨與凡百餘人捕者欲邀功賞而誣以不軌命應言往按其事止誅首謀數人餘悉全活之

按榮諲大監為開封府判官時太康縣捕民數十人事浮屠法相聚祈禳名白衣會知府賈黯疑其有妖請殺為首者餘悉流之諲以為本無妖黯具奏并諲議奏之朝廷以諲議為是乃流其首餘皆杖之蓋鄆

州之民傳妖法無不軌事太康之民浮屠法本無妖故重輕之差如此若非矜謹則或以為不軌而盡誅其黨或以為有妖而特殺其首不無枉濫矣 吳育參政知蔡州時京師謹言有妖人數千在州界詔遣中使名捕者十人至則請以巡檢兵趨確山索之育謂曰使者欲得妖人還報耶請留勿往此鄉民依浮屠法相聚耳可走一介召之立至今以兵往人心驚疑奈何中使以為然召之果至械送闕下皆以無罪

得釋而告者遂伏辜此又矜謹之大者也夫太康所
捕有罪而蔡州所送無罪何也事浮屠法相聚祈禳
名白衣會法所禁也依浮屠法相聚無祈禳事非白
衣會法所不禁也苟非矜謹之至豈能不濫如此哉

三事並
見本傳

王琪

王琪侍郎知復州民有毆佃客死者吏將論如法忽夢
有人持牒叩庭下曰某事未可遽以死論也琪疑之因

留獄未決有司曰無足疑者琪曰第留之後十餘日果有新制下凡主人毆佃客死聽以減死論吏民莫不神

服

見王珪丞相所撰墓誌

按此非思慮所及蓋平時矜謹故感於夢寐記曰至誠之道可以前知其此之謂歟

王延禧

王延禧朝議初為岳州沅江令歲饑盜起親獲十餘人賊皆應死法得遷官延禧歎曰是皆良民窮而為盜令

既無以業之又利其死以為己功亦何忍哉諭被盜者
悉裁其贓盜得不死延禧王黃州孫也

見曾肇內翰
所撰墓誌

按周禮荒政曰除盜賊謂饑饉盜賊多不可以不除
也延禧親獲十餘人蓋以此耳邀功希賞非其本心
故諭被盜者悉裁其贓使得不死夫捕盜之官利盜
之死譬猶矢人惟恐不傷人其術使之然也雖遷一
官而殺數人榮不足言愧何可勝君子豈忍為是哉
若殘民害物罪不可赦非窮而為盜計贓抵死者則

其獲賊受賞義在懲勸君子可以無憾也延禧所捕
實與此異故竊歎云爾折獄龜鑑終於矜謹惻隱之
心人皆有之為物所遷斯失之矣故有利人之死為
己之功者或文致於大辟或誣入於極典寧復能存
不忍之心以貸應死之命乎故著此事於謹篇末庶
幾覽者有所警焉

折獄龜鑑卷八

觀易之象雷電皆至豐而曰君子以折獄致刑山下
有火賁而曰君子以明庶政無敢折獄蓋獄者民之
命折獄者貴乎明而尤不敢輕用其明龜鑑有書所
以推廣其明而示人以謹重之意也宜春郡齊舊有
折獄龜鑑歲久字畫湯漶覽者病之余叨守既數月
獄訟簡清公暇出篋中所藏一編參訂遴匠重刊俾
覽者充拓聞見如龜決疑如鑑燭物是亦惟良折獄
之一助云景定辛酉四月上澣天台趙時橐謹書

